

本朝分省人物考

人物考卷之九十五目錄

山東兗州府

牛諒

曹本

韓克忠

竈直

宋亮

劉寧

王彬

師達

張本

樊敬

賈諒

孫時

李驥

張鄜

許彬

李興

郭魯

王賢

李秉

張琛

梁覲

王晟

李木

秦紘

孔公恂

秦崇

郭璽

侶鍾

王珣

劉約

王璟

杜玠

張賓

孟麟

魏紳

湯清

孟鳳

王憲

韓智

胡海

王崇文

王崇獻

王紹

陳九疇

劉田

劉坤

王崇仁

宋滄

張錄

樊繼祖

劉源清

張景華

吳鎧

王杲

路迎

彭占祺

柴世需

杜萱

劉隅

陳守愚

王汝孝

趙鯤

戴繼

侯度

扈永通

吳嶽

殷學

楊賢

田大有

曹邦輔

郭朝賓

靳學顏

任瀛

路可由

侯鉞

梁成

何海晏

朱綱

于玘

劉爾牧

劉寅

胡汝桂

張守蒙

王嘉賓

杜輅

張祿

李文芝

李良

王湘

于慎行

趙惟勤

張綸

劉不息

賈三近

趙雲翔

任勵

才學名錄卷之十一

三

王 潺

陳 職

蘇則曾

趙邦彥

楊挺高

本朝分省人物考卷之九十五

山東兗州府

牛諒

牛諒字士良東平人洪武初以秀才薦舉除翰林典簿同學士張以寧奉使安南太祖優詔褒美御製歌詩賜之使還報命擢爲禮部尚書洪武七年降本部主事尋復前官諒優於文學著述甚多爲世傳誦蓋國初才士也

曹本

曹本字子善滕縣人漢曹褒之後也父思明嘗夢數

人以車載篋至門問曰汝曹某耶思明應曰是也其人開篋取人支體與之曰此隸人支體也思明受之一人後至謂其人曰曹某當得一侍郎兒何故以隸體與之其人大驚曰吾忘之然侍郎皆已散盡奈何後至者顧視篋中良久曰此不一侍郎鼻耶遂復與之已而本生天資穎異志操不羣國初以貢遊太學官北平布政司都事永樂改元以勞遷刑部主事累官廣西按察使所至有聲洪熙元年陞兵部侍郎在部四年邊防經略宣力居多以忤於時宰左遷山西

叅政

韓克忠

韓克忠字守信城武人登洪武下丑進士第一授行
在翰林院修撰 太祖愛其學行淳實僅三月命署
國子監司業自祭酒宋訥後學政多隳忠與祭酒張
顯宗創制立法興廢補壞編立監規參酌時宜永爲
遵守學政自此振舉革除一年陞河南僉事未幾卒
於官初忠之會試也不與中試之列時所取宋琮等
五十二人江以北無一與者及殿試賜閩人陳郊爲
第一被黜落者咸以爲言 太祖怒命講讀官張信
戴彝等十一人再閱下第卷中擇文理優長者復其

科第三吾屬信等以卷之陋者進呈 太祖益怒謂其胡蓋餘黨詔謫三吾戍邊餘皆凌遲於市於是復閱取六十一人皆北人也六月朔殿試再賜策問以忠爲第一今祀學官

寧直

寧直滕縣人性穎敏好學洪武乙卯舉於鄉爲學官宜德間擢宿遷知縣寬廉平易興學勸農未期月民相率趨令邳州有張氏以種瓜爲業一夕爲人刈其苗殆盡訴於直直曰汝有讐家乎曰李榮與舊有怨直卽召榮及瓜田四鄰收其鎌鋤數十事雪之獨榮

鑷水味腥苦榮遂辭服州民張謹妻朱氏晝失金環
釵釧六事爲姑所撻幾死其兄弟訴於直直召朱氏
問曰是日往來者何人曰有出嫁小姑并鄰婦三人
卽日召四婦人至則以布蒙其面坐之帳中使各伸
足帳外令隸曰此是盜金環者取大杖杖之一婦卽
縮其足出而詢之乃小姑也一鞠卽服鄰境楊氏兄
弟五人爭產訟經年不能決越境來訴直命跪庭下
累日引古人兄弟友愛者反復開諭之五人感悟請
不復爭上元縣人有囊鈔五百貫爲人盜去訴於直
直曰汝何所見荅曰只枕一石他無所見直令人取

石入城隍祠決而求之復以其狀焚於祠下人爭趨
觀密令隸數人聽察衆人又令二人立門下凡觀者
出入皆索鈔一貫無鈔者不得出有二人私相語曰
我知盜囊鈔者我與汝至其家索分其鈔隸聞輒執
之遂得盜者其理民訟多類此正統元年卒於官邑
民老幼携扶哭於縣門相屬不絕有送喪至廕葬畢
而後歸者

宋 亮

宋亮字均禮魚臺人魁梧英發涉獵經史每以古人
自期洪武八年有司辟爲本縣儒學訓導承元餘俗

力以古道倡率數年之間風俗丕變未幾復應經明
行修詔拜福建右叅政撫綏有聲民懷其德值回祿
引咎罷歸優游耕釣鄉人隨而化之

劉寧

劉寧汶上人洪武中以監生任刑部主事剛毅廉明
不受私謁夫人安氏方櫛髮有以瓜盛銀餽者安氏
被髮呼僕拘送於朝 詔賜金幣勞之官至太僕寺
少卿

王彬

王彬字文質東平人洪武中爲御史巡視江淮靖難

兵至彬與指揮崇剛共守揚州指揮王禮欲舉城降彬與剛知之執禮及其黨繫獄彬外禦內防七日不解甲靖難兵飛書城中有縛王御史降者三品千戶徐政張勝縛彬昇至城上投靖難兵中不屈而死

師 達

師達字九達東阿人資稟過人八歲讀書日記千言少孤無兄弟奉母極孝年二十餘貢入太學從御史出按遼東方嚴不阿御史劾達逮至闕下囚服入見狀貌偉麗面如玉盤戟髯拂拂 太祖目而偉之卽以達爲御史不三月擢陝西按察使至則獄囚繫者

數千達檢案牘訊鞫各以其罪輕重立爲讞決旬月而盡永樂改元召爲兵部侍郎未幾改佐吏部典選幾二十年嚴密慎重人莫敢干以私車駕北征沙漠以達督運達以道里回遠飛芻輓粟疲不能給奏設頒舍於道令民互相送迎以次轉輸著爲定式營建北都遣達采木湖湘達以十萬之衆深入窮山賈販不通軍夫艱食乃爲除闕道路檄召商賈往來貿易軍民樂趨績用有成凡在湖湘八年 仁宗卽位念達暴露日久召爲戶部尚書兼掌吏部修明國賦選拔人材朝廷倚重焉宣德二年卒於位 賜祭葬如

制達爲人器宇恢闊議論侃直天性朴儉不殖生產
所得祿賜多分宗黨顯貴四十餘年有子八人無以
贍也 宣宗嘗與輔臣論扈從北來大臣持廉守正
者惟達一人郡邑皆祀於學宮

張本

張本字致中東阿人也九歲爲邑諸生後舉京闈鄉
試授江都知縣釐奸革弊豪猾斂迹靖難兵起擢揚
州府知府尋陞江西叅政巡行郡邑躬理民事祛除
蠹政吏無容奸聲稱愈起 詔爲工部侍郎已以事
廷旨謫交趾布政司吏復起刑部侍郎 仁宗卽位

以其特立不阿首進南京兵部尚書兼掌都察院事
召掌行在兵部宣德初征漢庶人本以戎樞扈從調
度兵食庶人伏法遣本治其餘黨本奏漢國吏民爲
王所脇倉卒從亂可無盡法以安反側詔從之一方
賴以全活時軍政久弊本奏遣大臣分出清理爲條
例頒行天下著在令典詔兼太子賓客數賜璽書褒
諭已以戶部政弛又命本兼之本夙夜講求興廢舉
陞必求至當宣德六年本病詔遣中使絡繹臨問諭
令近醫藥自輔母以國事爲念本涕泣受命未幾卒
賜祭葬世復其家本爲人直諒通敏持身廉介議論

侃侃有古大臣風同輩皆推服之 成祖時嘗宴近
臣各設銀器一案因以賜之惟本坐案皆設陶器諭
曰卿號窮張銀器不知用也本頓首謝郡邑皆祀學
官

樊敬

樊敬字守一鄆城人洪武辛未進士初授左春坊司
諫改行人司副擢鴻臚寺丞累至大理寺卿永樂八
年以左通政鎮守真定撫安軍民十六年車駕北征
時以廣惠伯劉才總兵王友行師朱律命敬馳至軍
中斬之撫師而歸十八年復以行軍司馬鎮守濟寧

撫操十萬壯士指揮等官得自除授總兵以下悉許
節制違令者斬其委重如此宣德元年以刑部右侍
郎清理江北軍務二年大征安南遣敬轉運軍餉深
入蠻方樵蘇不後敬鎮守濟寧時過其故里駐節城
南草堂里人榮之

賈諒

賈諒字子信澤縣人永樂中繇鄉舉陞太學選侍太
孫說書講論詳明深荷眷遇歷陞刑科都給事中正
色敢言廷中推重宣德間擢行在都察院右副都御
史會江淮羣盜劫殺夷使受命往捕以計擒之江

右豪民暴不奉法諒往按得實悉寘憲典良善以安
川蜀姦盜作梗捕其首惡餘黨解散正統初出鎮湖
湘鋤強暴屏表魑楚人頌之巡視江淮賑活饑民十
餘萬口歷撫諸省風猷凜然其居內臺益振紀綱存
大體卒於官賜祭葬如例入祀鄉賢子傑仕至陝西
叅政

孫時

孫時字習之鄆城人以舉人授壺關教諭陞金壇知
縣刑部員外郎出補河南僉事入爲大理丞亭讞寃
獄多所平反嘗以論報忤旨繫獄疽發於背 成祖

察其忠出之賜藥存問洪熙元年陞工部侍郎改南京太常寺卿正統改元固請休致賜璽書馳驛歸

李驥

李驥字尚德郟城人永樂間以舉人任戶科給事奏罷有司征商重稅者出知新鄉東安二縣東安有狼食婆婦之子驥惻然禱於神狼還死噬所秩滿陞刑部郎中以身事謫戍洪熙改元應薦遷監察御史嘗疏陳時政十餘條多見采納宣德六年陞河南府知府與治補弊鋤奸抑強道不拾遺居民爲立祠洛陽城東門歲時水旱禱焉

張 廊

張廊汶上人永樂中領解任教諭陞山西按察司經歷承檄執妖賊勦北虜屢立奇功陞廣東德慶知州母卒扶襯抵家廬於墓詔旌其門累官鳳陽府知府

許 彬

許彬字道中寧陽人第永樂乙未進士選入翰林爲庶吉士歷任檢討編修修撰與修 仁宣二廟實錄正統丁卯福建鄉試詔往蒞其事號稱得人己巳陞大理寺少卿轉太常 英廟被留虜庭虜酋悔過遣使赴京議和且要大臣迎駕僉以虜情莫測必須選

有學識大臣往覘虛實公論推彬彬曰主辱臣死此豈計身家時耶遂同都指揮馬政深入虜境凡三往返諭以禍福曲直虜悟奉駕以歸 英廟復辟首進禮部左侍郎兼翰林院學士文淵閣視事彬旣執政翰誠秉公侯伯中有以迎復爲功而陞秩不愜意者再三言於政府彬戟手詈之曰爾戮得幾人何功之有其人慚而退每爲 英廟言陛下當宥過錄材如王竑宋傑曹太商輅王偉才皆可用不宜置之散地昔唐太宗不罪王珪魏徵反錄用之輔成貞觀之治此前代明驗也石亨恃功驕恣權傾內外當如宋太

祖杯酒釋六藩鎮之權則功臣皆獲老死闕下今寵
亨太過恐非保全之道 英廟心善其言而未欲顯
露亨聞恨甚乃內結太監吉祥共擠之遂調南京禮
部侍郎中道復左遷陝西叅政又復以事繫獄遂乞
骸骨致仕卒年七十有六所著有東魯先生文集今
祀學宮

李興

李興曹州人以勤儉起家性好施與有貧不能償所
負者輒焚其券有喪不能舉者給以棺斂江西賈人
楊彥成負錢若干以女代之興卽遣歸不責其償同

邑蔡媼老無所依與收養於家終其身正統初大饑流民數百輩逋聚於曹哭聲振野與憐之出糧振贍有司恐其爲患將驅之出境興曰官府懼流民爲患而驅逐之是也然以數十百瀕死之民驅之出境必死無疑矣有司爲之少緩遂給以楮幣使詣闕陳情俱得占籍由是存活者蓋千餘家歲時伏臘相率來祝曹人傳誦以爲美談

郭魯

郭魯東阿人父履洪武中爲濼城教諭坐在任九年士無中式謫戍雲南魯及弟純皆以永樂間中式因

上疏請代其詞有曰李密孫男尚能報其祖母緹縈
女子猶得贖其父刑今臣父病體衰羸年垂六十跋
涉萬里道路艱危桑榆之景無多客死之期立至有
親至此生子奚爲書奏 成祖憐之詔召還仍以爲
鄞縣教諭

王賢

王賢字惟善寧陽人領永樂辛卯鄉舉登乙榜授鄆
陵教諭時學久廢弛賢嚴立條約課業有程不易寒
暑又言於有司新學官飭廟祀煥然一新士多所造
就戶部尚書張睿禮部尚書薛瑄皆其門弟子也陞

鈞州佐秩滿擢戶科給事中正統九年進光祿寺少
卿奉勅巡視淮揚盡心民瘼廉幹著聲 上知其才
召陞順天府尹輦轂之下兵民雜處權勢縱橫賢不
剛不柔爬奸剔蠹一處以公道人見其言動尊嚴不
敢以非禮干謁吏民化之嘗以柴炭爲民病走語工
部尚書石璞曰京民勞疲極矣今採運夫役與直保
諸郡等無乃不可請遞減之又惜薪中貴縱其下非
法凌府屬叱跪於庭熾火圍之賢聞趨至縛其人欲
以聞主者溫言謝乃釋去一日坐公堂有懸金牌直
入稱權勢官索板席若干賢曰明日來取察知其詐

及至執之寘於法九載滿表乞致仕不許陞正二品俸復任又三載再疏乞骸骨上曰卿年七十禮當致仕然京畿冗繁非爾不治所請不允英宗復辟之初顧近臣曰府尹如賢者何可得哉五年上章引疾力辭得請卽日上道士民攀援塞途戀戀不忍舍去在任以當務爲急嘗修府治學校及宋文丞相祠事集而民不擾苟有所省卽省之惟恐累於民故民德之深成化改元用恩例進階一級成化三年卒享年八十有一賢少時嘗夢入授之書曰讀吾書可衣緋不讀吾書止衣綠覺而異之數日於路得一書視

之青鳥家說也潛玩久之乃以善地理聞爲鈞州佐
時漢府有異志遣人構之不往曰欲得子非詔旨不
可漢王以名聞時 上以仁孝皇后未葬有事壽陵
曰吾正欲得之乃遂取以往見於房山 上指示其
處對曰此公侯地耳扈從至寶家莊蓋寶十郎故址
曰勢如萬馬自天而下真天子地乃定今長陵是也
前有小阜欲去之曰恐有妨於皇嗣 上問無後乎
曰非也但多庶出耳 上曰庶出亦可遂不去

李秉

李秉字執中曹州乾都人宣德乙卯領山東鄉薦第

一丙辰登進士授福建延平府推官有兇豪爲民害官莫能禁秉廉得其狀卽捕治之因被誣下獄後事白兇豪伏法其名愈著越兩考擢都察院經歷未幾丁內艱服除改戶部主事陞郎中出督鳳陽等處漕運再理宣府糧儲所至事集景泰辛未用薦陞右僉都御史巡撫宣府叅贊軍務總理糧儲秉請帑金三萬買牛給貧乏軍民秋成償其價上允之軍民樂業邊餉亦足且奏都督紀廣叅將楊能怠忽邊備能亦誣秉不法上降旨取回別用擬差都御史蔣林代之科道連章言風憲糾劾跋扈未辯曲直遽以撫

拾之言而改罷之適足以鈐言官之口 上止林行
命御史練綱給事中嚴誠往勘果誣勅切責能等乘
復奏准邊軍雖無妻但有四口同居者許支一石之
糧汰宣府尼僧配軍士無妻者又奏都督過興怯懦
無謀及叅將方政等陞官賣宅之罪 上切責政等
而以宅付代者癸酉虜人近邊放牧廷議擊之上疏
謂邊牆之外皆夷狄牧養之地彼未嘗犯邊掩其不
意而襲殺之是倖功賞而啓邊釁也 上嘉納之虜
寇以剽掠男婦易糧米 朝議每大口米一石小口
米五斗虜不從乘曰是重物而輕人也每口與米一

石總兵官以爲礙例秉曰何忍使吾赤子爲夷人耶
專擅之咎吾任之悉如數與之後具聞 上允不究
常條陳邊務其目曰蓄將才恤孤寡增衣糧汰冗員
專防守肅邊備行營田革奸弊杜奸謀停造作修城
池均田土貨官鹽悉允行之數年之間邊境無虞軍
民攸賴至有祠於家者天順改元巡撫江西一守陳
泰之制改蘇松加耗之例時郡縣多貪吏爲民患秉
去其甚者數人餘悉改貪爲廉民始得安其業戊寅
巡撫大同等處一時痛革諸弊凡朘削軍士者必置
於法羣情洵洵度不能自容乃以事中之坐除名久

之 上知其誣特召復職掌南京都察院事甲申進
右副都御史再巡宣府越兩月擢左都御史掌院事
屬歲當考察乘舉劾無所避公論快焉是歲秋 上
以大同等處邊備廢弛 命秉整飭適虜寇入境秉
率官軍與戰於鳳凰山擒獲人畜萬計成化二年建
州虜酋董山作亂復 命秉提督軍務討之秉奏建
州等諸部落進貢邊臣不得過爲棟擇以啓邊釁下
部議從之三年同武靖伯趙輔破女直擒董山等二
百餘人誅之師還特賜一品服勞以羊酒丁亥遂拜
吏部尚書錄建州功進太子少保秉素剛直不阿人

意及居吏部凡內外士夫有聲望者皆以次擢用不
得上命不已會大臣有忌之者嗾給事中蕭彥莊劾
之遂落太子少保以尚書致仕前祭酒陳緝熙不平
作詩送之有古道自無三黜慍直臣又見一番歸之
句人相傳誦方秉被劾時六館士就試於禮部咸曰
某罪不測則願不試以贖之及聞薄責乃罷丁未
恩詔進階光祿大夫又二年卒年八十有二秉居官
介然有守無敢干以私者及與鄉人處忘其勢位人
人得而親之後謚襄敏予祭葬

張琛

張琛東平人正統間由舉人爲衢州府同知迎父就養父卒廬於墓側泣血三年不視家室服闋陞吏部文選郎中銓選公明爲時所稱仕至福建左布政使

梁 覲

梁覲字廷實東平人正統間舉於鄉薦授監察御史歷按陝西河南以言事忤時宰謫嘉善丞未幾復官山西河南大饑時撫治鄖陽馬文升奏求如梁御史覲者往蒞焉朝廷從之遂擢爲陝西副使控制要害懷來安輯民得樂業漢中人感德爲祠祀之

王 晟

王晟字景昭鄆城人舉正統丙辰進士初授刑部主事陞員外郎英敏剛直鞠獄平恕秩滿陞浙江僉事專理山場銀課時麗水青田諸縣山賊陳鑑湖等哨聚劫掠晟召募勇敢殺賊數百人巳而賊勢復張官兵不能支晟遂被執罵賊而死事聞遣官諭祭贈江西叅議官一子

李木

李木字時升曹州人景泰甲戌進士拜禮科給事中繩糾得體輿論稱之遷尚寶司丞陞本司卿本性友愛念兄子蚤孤撫養教訓視如巳子又舉先人遺產

悉讓其姪里中至今義之累至南京光祿寺卿卒於
官後賜祭葬如例

秦 紘

秦紘字世纓單縣人性剛毅不與世苟合景泰辛未
成進士擢南京御史侃侃奉職綽有風裁天順元年
以事忤左都御史軒輓軒疏紘不職降宜黃驛丞御
史練綱知其賢薦知雄縣天順八年又忤中官下獄
調陝西平谷知縣廉能有威修建縣治學舍民自不
擾成化元年陞葭州知州政平訟理二年調秦州知
州廉明剛果民多愛慕五年陞鞏昌知府持身公正

不敢干以私又禁官府市賣豪猾無緣爲奸久之調
西安府益勵精勤庭無宿案賦役累數萬心計不爽
錙銖雅性儉素孤介無纖毫費及於民進陝西右叅
政陞左布政使在關中最久民情益練凡典司出入
雖寸牒禽豸皆手書閱奸黠凜然知戢又平徭役完
逋負至於聲色讌遊之樂泊然不戾其心說者謂絃
起西安歷藩司與余肅敏同聲望並著至今陝西並
祀於遺愛祠十六年陞右僉都御史巡撫陝西時秦
府旗校肆橫民苦之絃擒治不少貸秦王不能堪奏
其欺滅親王 憲宗震怒逮下錦衣獄命內臣尚亨

藉其家止得黃絹一疋故衣數事亨回奏紘貧狀
上親閱其貲嘉歎良久詔釋其繫且錫鈔萬貫以旌
其廉調撫河南既抵任巨鎬汪直亦以事至汪時竊
弄威福聲勢烜赫他巡撫官率屈禮以見紘獨與抗
禮略不爲屈汪亦重之不爲較紘乃密疏汪多帶旗
校騷擾地方後汪回京上問各省撫賢否汪獨稱
其廉能上以紘疏示汪汪叩首伏罪稱其賢不置
上釋之未幾改撫宣府時虜患方劇日夕謀求邊務
謂禦虜莫如自治乃謹圻堠明烽火蓄威養銳以待
之邊境恃以無虞二十年改左僉都御史理院事風

采益峻御史姜紘輩不職劾之皆謫去陞戶部右侍郎未踰數月以忤時貴降廣西左叅政弘治元年太宰三原王端毅公素重其剛正特起左副都御史總督漕運益侃侃自樹風采嶄然已而進右都御史總制兩廣兼理巡撫先是山後諸賊爲患有年紘調兵委湖廣按察使陶魯討平之時總兵官安遠侯柳景貪黷不法具列其狀劾之逮下刑部獄追賊鉅萬禡其爵秩景挾戚畹干內降冀減其贓且撫他事誣紘以圖報復紘亦被逮赴獄坐免臺諫交章論救王端毅又極言其當大用起爲南京戶部尚書持身孤特

御下以嚴不入非義一錢及致仕行李蕭然歸家閉門不理外事臺諫交薦起之十四年北虜犯固安等處起戶部尚書兼左副都御史總制陝西固安等處軍務巡撫而下咸聽約束至則奏陞開城縣爲固原州明年冬甘涼諸路備禦官軍以資乏乞少休息武安侯鄭英以爲虜酋在套不可絃曰時草枯馬瘠虜必不至已而果不至所省芻餉甚多嘗謂守邊之策惟戰與守乃推演古法造兵械置火器修海子口等處九堡甃石爲垣裹鐵爲門及築下馬房邊城三百餘里以絕虜道又修城堡關隘一萬四千一百九處

劉崖設險三千七百餘里自是北虜不敢窺伺時固
原城市地荒民貧乃拓其外城奏移鹽所於此由
是商賈流通公私兩便又創修孔廟廣學舍人才彬
彬興於文教至今言總制經略之功必以紘爲第一
十七年加太子少保召改戶部尚書理部事未任乞
致仕十八年卒於家贈少保謚襄毅紘平生所慕廉
介居官四十餘年至大司徒所居僅蔽風雨妻孥菜
羹麥飯不改其舊及卒家無餘貲未幾子孫有貧乏
不能存者其操節始終一致爲時名臣云

孔公恂

孔公恂字宗文曲阜縣人宣聖五十八代孫景泰甲戌進士授禮科給事中天順中李賢言於英宗謂公恂與贊善司馬恂皆古聖賢後可居輔導之職遂同日起陞少詹事侍憲廟於春官及卽位改大理寺左少卿因自陳不諳刑名仍改少詹事兼左春坊左諭德會撫寧侯朱永命出征公恂上章留之且言永當時武臣中一人而已爲衆所嫉被劾出知漢陽府未之任丁內艱服闋復少詹事任南京詹事府卒於官公恂慷慨尚氣不肯卑污屈抑遇非其人一言不合輒悻悻然見於顏面而去故在宦途亦屢起屢

蹶云

秦 崇

秦崇字智崇單縣人天順四年進士授兵科給事中
憲宗卽位與諸科臣糾劾權倖舞法者成化元年貴
州蠻酋起爲邊患朝廷命將征之崇往監軍凱旋遷
都給事中陞太僕少卿南光祿卿轉南太僕卿弘治
三年遷應天府尹明年卒官邸蕭然府丞冀綺合賻
贈爲治後事訃聞賜祭葬崇性剛勁不屈居官三十
餘年皆財貨出納之地而清約無染尤人所難

郭 璽

郭璽字文瑞城武人天順甲申進士初選庶吉士以請解館激怒李賢授工部主事時宦官黃順貴幸嘗有私屬璽叱之因誣璽以酷暴被逮責問復命搜其家惟圖書舊衣敝被而已 憲廟怒責順曰爾奏郭

璽如彼是誣之也黜之南京遂遷兵部主事松潘指揮楊安沒而無子族人謀其爵者賄當路已有成言惟璽不從卒卻其賄而置之法所善給事中閻某嘗以忠義相期閻畜名馬玩好璽不知也一見遂與之絕剛正之聲聞於中外 憲廟嘗書其名於御屏曰清介郭璽遷員外郎卒今祀學宮

侶 鍾

侶鍾字大器鄆城縣人成化丙戌舉進士授浙江道
監察御史都御史黎陽王越特薦御史四人可大用
鍾其一也十五年陞大理寺右寺丞轉左進本寺少
卿陞右副都御史巡撫保定擢刑部右侍郎歷官戶
部尚書在部四年屢以師出給餉有勞賜綵幣白金
以疾在告命醫診視中官禮問於家賜內醞諸珍物
尋請老溫詔慰留不允再以疾請命馳驛還鍾白哲
長身不妄語笑剛毅諒直夙夜惟勤初爲御史時奉
勅巡兩淮鹽中費用事者道淮勢張甚獨抗不與見

名頓起及按事尤煩劇鍾不遑自逸日閱訟牒夜分
乃寢凡行臺亭榭舊以備遊眺者悉封不視有布政
以賄聞暴於衆卽引疾以去致仕兵部項尚書忠嘗
爲鄉人誣奏禍叵測承命與中貴人讞之白其寃項
宗獲全海鹽海岸崩工久不就令所司以荆器實磚
石先塞旁流工乃成夏旱不雨虔禱立澍監秋試場
黜舉子之私以賄請者而不暴其名曰毋以一人玷
我賓興盛典比還朝論列益無避忌巡撫遼東都御
史馬公文升亦爲用事者所惡風鍾劾之鍾不可竟
以蜚語中傷被廷杖鍾執益堅卒不屈其巡撫保定

却守關者餽金河間海濱淤地舊爲豪所占種者悉
還之民其在江南日以擇廉吏禁侵漁爲阜財要務
屬吏之彊有力者亦被笞掠歲值澇條寬恤事請允
之旣而澇復甚又條奏九事戶部格不行時特遣廷
臣齎內帑銀賑杭嘉湖三府水災因上疏理前奏且
言蘇松嘉興杭湖五府均之赤子也賦稅之出蘇松
重於三府水災所傷三府輕於蘇松今三府乃蒙賑
恤而蘇松之民何獨不一蒙恤念乎又奏設高淳縣
以分治溧水民便焉其在吏部進退黜陟一視輿論
卽有薦剡未嘗令人知以爲恩其在都察院詳定條

例夙夜惟謹讞獄俱從仁恕在戶部振刷宿弊事無
滯流嘗以四方多災報乃疏十二事以聞於時政多
裨益焉又以九門內臣職譏察不可令干國課疏累
上必得請乃已時國用不足上疏言冗食太多宜汰
減內降官吏光祿寺供應大繁宜減內侍及畫工番
僧酒饌天下有司存留糧稅歲不充用宜自郡王以
下量爲裁處太倉銀不宜收入內庫內庫所蓄金幣
不宜修齋造像及充私賞城門中使不宜干預國課
朝廷難之久不報及貴戚有丐長蘆兩淮鹽引者既
得旨又執奏乞寢成命以杜將來 上是之常創被

庫以儲羨餘諸司由是有所稽覈比去積儲至餘千
萬鍾居家孝友晚雖謝客日以書史自娛至語及時
事輒鬱鬱不樂屬纊時子以後事請不答但云天下
事大可憂而已壽七十有二

王珣

王珣字德潤曹縣人舉成化己丑進士授太康知縣
調繁信陽擢南京監察御史行部蘇松獲劇盜三百
陞四品俸時部中所獲至數千人珣按其非實多所
平反曰吾不能殺人求進也歷湖州府知府陞河南
叅政轉本司布政旋陞右副都御史巡撫寧夏以寧

夏孤懸河北而境土狹小當先守後戰因濬賀蘭山
渠以廣屯田遏虜騎邊防賴之虜寇花馬池深入臨
鞏總兵郭錡以衆寡不敵不敢出戰珣曰虜深入獲
利而還實驕且疲以逸待之勝可必矣戰於石溝破
之道階通議大夫無何以疾致仕章再上得馳驛還
珣爲人孝友少時爲兄璉所撫及考滿受廕官其兄
子以報之里人稱焉卒賜葬祭如制祀於學宮所著
有奏稿十卷南野詩稿二卷

劉約

劉約字博之東阿人第成化己丑進士累官吏部郎

中出爲河南叅政徽王嘗請民田若干以益國租下
吏勘實約奏以田還民王賂劉瑾遣他使復勘以田
予王逮約下吏罷之瑾誅乃復故官約爲人修偉有
儀器識超越初聘里中徐氏女忽病目而瞽女家以
返幣請約曰女瞽卽棄不娶假使男瞽女家亦不字
耶終不改聘其後女目忽開里人奇之約生六子兩
舉進士爲名臣各有傳

王璟

王璟字廷采沂州人舉成化壬辰進士除登封知縣
六期以清節聞擢南道御史凡所論列悉關大體讞

獄不泥成案率多平反以起復改北按視山海等關
保定諸郡旌別臧否罷行利弊累至光祿寺卿轉右
僉都御史總理兩淮鹽法通變革奸私販屏跡浙東
大饑被命賑濟條上經畫要宜十事奏省杭湖軍糧
三十餘萬石所活四十萬人改巡撫保定疏陳地方
事宜并乞罷皇莊名目以蘇民困 孝廟嘉納之時
中官奉 命勘寧晉新河諸縣土田吏稍侵侮遂奏
遣官校捕捉鄉民二百餘家遠近驚擾璟備疏其害
謂宜斥罷諸璫田土盡歸小民人皆壯之正德丙寅
入理院事逆瑾矯詔罷官瑾誅薦起巡撫山西時巨

盜流劫河東爲甚璟至閩視通賊處所設險防禦製
火鎗火箭等器攻守具備斬獲頗多山西地瘠民貧
復經兵燹凡各部歲派物料及戰馬四千餘環疏請
改徵以甦困弊已召爲左都御史掌管院事獨持風
裁朝廷倚重嘉靖初進太子太保乞歸因給廩米與
皂仍勅有司歲時存問卒賜祭營葬如制今祀學宮

杜 玠

杜玠字仲純滕縣人世隸武籍父紀獨改業事儒玠
舉弘治庚戌進士授慶雲知縣擢戶部主事刑部員
外郎中出爲山西僉事時大寇劉六等攻破壺關御

史檄玠守沁州玠塞險守隘繕城浚池勸粟穀治兵器盛旗幟簡練士民軍聲頗振賊由他道引去不入沁境良民爲賊所虜者乘間逃歸有司輒捕論之欲以爲功玠悉出之定襄有饑民千餘聚匿山谷中有司以反聞撫臺議發兵擒捕玠乃言曰有司不能備荒於平日民無所食乃相聚山谷以延數月之命今捕之急此不北走胡卽以死拒我矣治亂民如治亂繩宜撫而解散之遂畫方略數事撫臺乃檄下州縣如玠指數月悉平玠爲人疆力能肩大事不可搖奪部有貪吏玠發其贓晉宗冒支祿糧九千核其實以

請因與撫臺相左引疾乞歸詔陞山西叅議致仕玠奉母至孝家庭嚴肅夫妻相待如賓教子弟必先孝謹而後文藝卒祀學宮

張 賓

張賓字廷賓單縣人成化戊子舉鄉試乙未舉進士授睢寧知縣以憂去服除改金壇擢監察御史弘治庚戌遷湖廣僉事復丁父憂服除改山西遷浙江副使江西廉使正德丁卯遷南光祿卿明年廷臣薦爲大理卿劉瑾用事怒無所餽遺勒令致仕賓知睢寧時大稔發廩賑饑或勸待報賓曰穀爲民積今爲民

發之罪我自當也金壇又大水以全災報都御史怒
上九分災賓抗言曰民溺而匿之不仁告不以實不
忠民將萃矣爲御史劾太監蔣琮擅伐山陵琮幸臣
也疏入不報巡山海立社學使行伍皆知書守備劉
某貪殘有內援案寘之法湖廣知縣某素佞幸上官
後民訟下賓治都御史屬賓曰此官賢罪當坐訟者
賓竟罷之御史喬恕按江西嚴斷省府畏之禮諂言
甘賓至將衣豸見或勸更他服賓曰此吾命服如面
君又何如每與御史論事更端復起媿媿不厭御史
憾之賓抗執如初布政林某謁御史趨賓止之曰奈

何以藩長效驛官久之御史薄林而賢賓賓司刑久
明決而平恕句容有獄十五年矣囚請於御史願下
金壇縣治死無恨御史曰彼非我屬囚泣下曰他官
喜賂故使其冤今江南清官獨金壇耳御史乃轉白
他御史下金壇事果得理在山西斷文水二氏田治
藩府暴橫江西最健訟訟必逮數百人得利則自承
反坐賓一切平恕譬解之寧庶人恃才御三司如輿
隸其尉坐事求末減賓卒不撓江西副使蔡清林廷
玉皆行義士一日相詬欲相擊詣賓求直旣見悔愧
不敢言而罷御史張淮按睢寧民狀賓善政賓曰此

市民獻諫令患無政無患無聞山西省城北廣袤百
里無水宿相地得并有欲紀之者宿不可湖廣民作
德政碑寘見毀之居浙入覲垂橐如京知府于鳳喈
有獻不納宿素貧不妄取未冠時夜讀書鄰女私就
叱之尤薄勢利曰官豈一家物哉有以官爲家者未
之思耳卒年七十有九

孟麟

孟麟曲阜人性行恬素操守嚴潔聰穎力學寒暑不
倦舉成化甲辰進士歷工部主事郎中奏興水利六
事至陝西左布政歷仕凡三十年清苦自安不營家

業及歸林下衣食無以爲給淡薄清修悠然自得邑人高其節祀之學官

魏紳

魏紳字廷珮曲阜人母卒廬墓三年朝夕哭奠舉成化辛丑進士歷刑部主事郎中廣西有冒稱外戚者事覺被逮人皆避之紳一訊卽得其狀累遷都御史歲旱奏減民稅四分之一築邊墻四十餘里增墩堡五十餘所孝宗賜璽書褒勵官至刑部侍郎卒祀學官

湯清

湯清其始祖祿從 高祖起兵累立戰功世襲指揮
僉事隸籍濟寧衛清於成化中襲父職勇幹有略奉
命督山東濟寧棗林闡招調四十八衛以飛輓著績
調宣州衛指揮同數傳而族遂大四世孫湯鈇弱冠
補郡文學篤於孝友嘗鬻舍傾橐爲伯兄館償所負
庫金家以益落值歲大侵日不能再炊道逢遺囊裹
金及典質券可百金候之終日爲筆其處去後遺金
者願割以謝叱且笑手還之歸而與家人共饑厄幾
無以存也劬書攻苦至老愈篤郡博士李公別駕戴
公後先設席東贄之外卒無所點染諸大夫高其行

聞於學使者旌之異等優賞甚腆諸所與交游多後
先以達而鈇孤貧杜門自絕不肯交一刺也曰吾不
能自達亦不能過達者之門

孟鳳

孟鳳卽臧鳳字瑞周號梧桐山東曲阜人父紀由舉
人任華亭訓導鳳生與伯兄麟同衽弘治己酉發解
山東庚戌登進士第選知嵯縣嵯浙東巨邑齒繁而
賦殷至則勤農桑興學校務在使民利安又礪石甃
堤百八十丈以障水衝民甚便之材譽日彰治聲騰
播徵福建道監察御史丁內艱服闋改浙江道出按

宣大時北鄙多警肅憲貞度以振戎備虜聞之不敢
侵軼復按江西值寧藩潛蓄異謀一處以正折其機
牙比及代不能少逞在道七年疏屢上未嘗示人人
問之答曰揚人之過以爲己名予弗忍也陞懷慶知
府挈綱維布條約倡僚屬以興教化均徭平賦扶善
抑奸開惠通河漑民田二千餘頃暇則進諸生語以
讀書作文之要陞河南左叅政督理糧餉屬流寇猖
獗提督彭公率官軍追勦引鳳自輔鳳雖司犒賞稽
餽饗而匡贊寔多寇尋殄滅督運至京輸納以速而
餘羨有歸公私稱便陞河南按察使夙興蒞事祈寒

署兩弗休書所行者於壁日稽銷之吏屬警畏刑獄
一清陞山西右布政使銓司奏舉方岳以行旌異之
典鳳首與焉尋轉河南左布政使務持大體略細苛
旬宣之政既舉而案牘出納纖悉必明陞巡撫保定
右副都御史巡撫順天等府嚴察舉飭兵戎罷庸懦
畿徼以寧後以讓敵功屢有錦襲寶楮之賜改提督
漕運時漕政久弛悉心經畫選能以任功剔蠹以祛
害運舟相繼而上國賦以充兼巡撫鳳陽等府威信
素著禁令益行第以河溢徐邳田廬湮沒 聖駕南
巡之後儲峙一空乃奏免常租裁縮冗費民之死徙

者稍用甦息又建徐節孝陸丞相祠延學者讀書其中
中以作人才以厚風化辛巳陞刑部右侍郎適世
廟承統命以本官兼左僉都御史提督宣大三關等
處軍務至則選將領作士氣明賞罰謹烽堠虜懼弗
入間一入焉雨雹交作而去咸曰此天威也有希
功者執遊僧乞丐數十人以爲奸細力辨於朝竟得
全活癸未奏復孟姓六載考績進階尋轉左侍郎陞
南京刑部尚書精白一心申嚴邦禁不徇於情不撓
於勢始或議之終乃貼然服入官三十七年歷事三
朝清慎勤倦倦自盟而忠孝大節尤所致謹於寢門

大書戒慎恐懼四字時爲省觀修身以達於宦業槩可知矣

王憲

王憲字維綱東平人第弘治庚戌進士授阜平知縣改滑縣入爲監察御史巡按蘇松諸郡時有豪貴怙勢暴橫鄉里家置水牢有負其債者禁滯於中憲發其罪狀置之於法一方肅然進大理寺丞尋陞右僉都御史清理甘肅戎政進右副都御史巡撫遼東外艱起復歷撫鄖陽大同虜入應州憲勅所部斬獲甚衆捷聞賜緋魚晉戶部右侍郎巡撫關中已而改佐

兵部宸濠謀逆扈駕親征經畫軍需所在節省江彬
矯詔繫國子生跪於行宮門外憲入奏事因力白詔
貫之明年晉本部尚書嘉靖改元乞休歸里六年詔
以本官兼左都御史總制三邊吉囊人寇調集兵馬
分屯要害授以方略戰於細溝堡五日四捷俘獲甚
衆璽書褒獎進太子太保明年改南京兵部尚書叅
贊機務再改左都御史總持內憲居二年乞休辛卯
遣官卽家起爲兵部尚書會雲中逆卒戕辱主帥招
誘胡虜據城抗命憲舒徐運奇旋就底定以年滿七
十乞休賜傳歸里仍給月俸輿末以示優榮卒年七

十有三追贈少保謚康毅諭祭管葬如制憲天性孝友敦尚節儉歷官四十餘載不激不抗有古大臣風所著有督府奏議等書

韓智

韓智字愚夫滋陽人五歲能書大字有司以奇童薦入翰林第弘治庚戌進士授禮科給事中累至工科都給事中在諫垣十餘年論議明剴緣以文義有賈人附會貴戚侵併鹽利智抗疏劾奏聲動廷中他所陳說如正心任賢愛爵賞節財用之類多見采納嘗勾稽宣府邊儲尤稱明審居常手不釋卷問學淵博

所著有澹菴稿少師李東陽嘉其素行爲表其墓祀於學官弟普登成化丁未進士仕爲御史兄弟友愛人無間言

胡海

胡海字朝宗城武人爲人端方謹畏蒞事不苟初知東鹿作新士類愛養百姓清敏之聲著於上下擢廣西道監察御史嘗清軍兩浙甚得憲體後陞按察司僉事未幾致仕歸進階副使家居非公不見邑宰戚里有干請公事者大者則辭曰不敢小者則辭曰不屑于者怒曰安得不大不小事以干公耶年八十六

而卒

王崇文

王崇文字叔武珣第三子也弘治癸丑進士授翰林庶吉士改戶部主事歷員外郎中武宗卽位遣中官織造因討長蘆鹽萬二千引鬻銀買料崇文與李夢陽等言於尚書韓文執奏至再得旨減半歷江西四川提學副使擢山西叅政壺關盜起將發兵勦之崇文戒勿輕出諭以禍福多所解散因擒其首惡餘黨悉平由河南右布政使陞右副都御史巡撫保定引疾罷歸卒賜葬祭如例今祀學官所著有兼山

遺稿

王崇獻

王崇獻字季徵珣第四子也弘治丙辰進士選翰林院庶吉士後改禮部主事以逆瑾擅權引疾告歸瑾銜其避已削藉爲民瑾誅改兵部主事時山東江浙巨寇稱亂崇獻條陳六事悉見採用寇平賜白金文綺西北夷兀良哈入寇用總制叢公薦屬崇獻往先聲搗巢棄馬用步設奇料勝卒以成功尋陞郎中奉命徵南直浙江驛傳銀盡革積弊歲餘得銀四十餘萬陞南京尚寶司卿以錢寧專政復引疾去嘉靖戊

子用言者薦起爲南京通政司右叅議再晉南京大僕寺卿癸巳拜左僉都御史巡撫寧夏偶感時事三疏乞休得歸家食三十年屢薦不起扁其堂曰三巳所著有孫子釋疑小學撮要禮記擇言雙清詩集韻語拾遺等書

王 紹

王紹字繼宗曹州人舉弘治癸丑進士授南京太常寺博士擢監察御史巡按貴州蠻夷劉五支黨覆逆紹單騎諭以大義賊衆皆羅拜解散時閹瑾忌之出爲山西按察司副使累官光祿寺卿致仕歸值歲大

疫捐俸延醫存活者十之七嘉靖乙丑 詔進大中
大夫有司備儀問勞月廩歲給當道扁其堂曰清朝
存問

陳九疇

陳九疇字禹學曹州人弘治壬戌進士授刑部主事
囚越獄勢莫敢撓九疇荷戈獨先囚敗就擒名重京
師恤錄南畿閹瑾以不賂銜之謫廣東陽山令瑾誅
詔還歷郎中任四川叅議從制府彭公澤平流寇藍
鄔陞陝西副使尋陞按察使嘉靖改元以宿望擢副
都御史巡撫甘肅時九疇在甘州虜偵知直趨肅州

率驍騎晝夜五百里凡七日與虜戰梟夷王首斬獲
甚衆捷奏壘書賞勞甘肅等處皆有生祠爲忌者所
中傷詔下之理尋 手勅廷尉赦之 覃恩致仕家
居州南卑濕間澇則傷稼蕩廬爲請通渠今以永奠
已亥歲饑輸粟百斛計散俸金六百民藉以甦

劉 田

劉田字伯耕約之長子也爲人俊爽玉立豪宕魁壘
少所折節而孝友慈祥藹然篤至年二十餘舉弘治
乙丑進士授元氏知縣爲治嚴明不阿權貴時劉瑾
用事遣中貴人刺事畿內所至長吏皆郊迎謁及入

元氏坐傳舍召令至田駕車雍容傳呼而入中貴不
爲起田厲聲曰咄闖胡不爲長者下坐中貴大愕起
呼其徒欲辱之田前提其一人擲堂下召吏縛送獄
曰若刺事郡邑奉何詔旨吾上書請之矣中貴大困
蒲伏求解久乃得去走白真定知府知府大恐以千
金爲謝不使知也時郡邑多獻生物元氏人得白兔
送邑僚佐大喜以爲奏當授賞皆前賀令田笑謝之
乃置酒召丞尉博士飲酒三行奏炙起屬客曰諸君
噉白兔炙否此乃是也丞以下愕不能對田笑曰諸
君樂飲耳今豈獻白兔者已召爲戶部主事稍遷員

外郎正德丁丑命督江南漕運時漕政久廢有司催科後期而軍衛尉士多所需索吏毋敢笞其一卒田悉繩以法如期而竣年三十有九卒于官今祀學宮

劉坤

劉坤字伯生壽張人少而穎異都御史劉大夏治河張秋見而器之爲建屋十楹以居弘治辛酉舉於鄉嘉靖初以母老就選得萬安知縣富民彭嵩與南林爭訟嵩投書賄千金坤出書折嵩嵩懼服罪及坤入覲林復持百金爲贈坤又却之陞山西汾州知州汾宗藩常祿歲九萬金民間不以時完或稍漁羨輒持

守長短坤裁之以法宗祿不匱已而思母乞休四申
乃允坤爲人端誠醇謹孝友著聞其處鄉里尤敦嫻
睦助棺以葬者十餘喪里人識與不識服其家行至
今稱之

王崇仁

王崇仁字仲安珣第二子也第正德戊辰進士授工
部主事時土木繁興貂璫競爲請托崇仁蒞之以正
上下肅然盜起充豫奉詔討之仁綜理諸營器具先
事備辦兵以無譁遷刑部員外郎轂下獄事多涉權
貴據法治之一無所徇出爲江西僉事宸濠潛蓄異

志其妻黨素橫悉裁以法濠欲中傷之乃餌以重幣
崇仁辭不受竟無所得其間改陝西副使飭兵洮岷
時虜酋亦卜刺出沒西海因上區畫事宜當道不用
遂引疾歸今祀學官

宋 滄

宋滄字伯清鉅野人舉正德戊辰進士授中書舍人
陞刑部員外郎清雪冤枉平反惟公選陞鴻臚少卿
歷陞左通政嘗疏陳時政六事俱中肯綮滄貌偉聲
揚敷奏明敏朝著色動擢左僉都御史巡撫四川入
境宿神宣驛夜半有數鬼訴冤及至成都乃訪向鬼

所訴者核其情實置之法遠近神之會白草番蠻切
掠安綿城堡滄移兵擊滅之復所侵十八寨真州流
賊周天星嘯聚可三萬人官兵不能擒制請於朝發
兵勦平前後壘書褒賚陞右副都御史 世宗每念
滄功且熟於禮嘗曰天下巡撫皆如宋滄朕無憂矣
一日傳御札擢滄禮部侍郎掌鴻臚事主者奏滄有
功方鎮不宜處以寺卿遂寢已而五奏乞休予告還
里而卒鄉人慕其忠孝祀之學宮所著有臺文稿十
卷秉忠定議十卷

張錄

張錄字宗制城武人登正德辛未進士初授太常博士擢貴州道監察御史清介敢言時西夷貢獅子錄上言明主不貴異物惟懷永圖請卻其貢嘉靖五年大同兵變朝廷遣侍郎胡瓚興師問罪復使錄出按錄至宣布朝廷恩威叛卒方棄甲兵填滿街巷各歸本衛及議大禮與張桂相左不數月張桂驟登樞要復劾之曰祖宗之法不可變僥倖之途不可啟大爲張桂所啣尋按山西憲度修明汚吏遁迹雖權貴有犯者亦不少貸及陽曲賊李午作亂當誅賄囑權貴得免先御史馬錄疏發其事謫戍南丹錄繼其後

復上疏申理竟以此罷後當道有薦之者亦不往謝
有勸其通書執政者笑曰吾昔以言而失官今復以
言而求官乎家居二十年卒

樊繼祖

樊繼祖字孝甫鄆城人侍郎敬之曾孫也舉正德辛
未進士授臨穎知縣流寇倡獮修城嚴備寇不敢犯
召爲監察御史 世廟卽位疏請勸學勤政條陳明
切俱荷嘉納奉命查勘畿輔莊田清出侵占民田二
萬餘頃一時權貴爲之斂跡陞河南副使勦平劇賊
稍遷江西叅政值大同兵變拜右僉都御史往撫其

地繼祖力主招撫請奉金牌宣諭因設方略內應推
其首惡邊鎮以寧晉右副都御史佐理院事遷兵部
左侍郎己亥 聖駕南幸提督薊州山海等處邊備
進兵部尚書兼左副都御史總督宣大時虜騎充斥
縱掠關南繼祖督兵應敵積首虜共八百五十七級
癸卯改工部尚書採辦大木督發不匱後以太子少
保謝政家居卒年七十九所著有秋霽玄吟南國漫
興金丹百詠及雙巖奏議雲朔行稿縣弧徵志諸集

劉源清

劉源清字汝澄東平人舉正德甲戌進士仕江西進

賢知縣值宸濠叛源清以縣當午道日規戰守計揭
旗大書誓死報國四字仍積薪環室戒曰事急卽火
吾家母汙于賊會濠命婁伯及闍樂圍以兵出縣境
源清募死士二百人繞出其後獲伯圍誅之濠復移
檄源清源清立斬其使以是濠兵不得越進賢而東
賊勢少沮王守仁起兵檄與俱進賊竟殄滅徵拜監
察御史尋陞大理寺丞擢僉都御史巡撫宣大調度
士馬歲省四十萬金北虜大舉入寇總帥被圍源清
冒險遣發斬首虜數十餘級虜遂遁去滴水崖卒郭
春等與民訟辭屈以數百人據城叛源清遣兵附城

呼曰禽春等數人而止守陴者執春等斬之進副都御史再進兵部左侍郎總制宣大會大同軍亂源清奉命討賊總兵卻永決水攻城賊勢已窘郎中詹榮因得入購其黨斬倡亂者以降源清以籍手逆黨爲恨不居其功侍郎黃綰附尚書夏言因爲蜚語中傷逮繫司寇年餘給舍曾忬爲之論辨乃得罷歸隆慶改元言官交章追論詔贈兵部尚書賜祭遣官營葬源清忠貞孝友出自天性崛起寒素偉幹負氣臨義不顧利害嘗有恩蔭舍其子而蔭弟之孤人以爲難

今祀學官

張景華

張景華字時美，郟城人。舉正德甲戌進士，初授吉水知縣。剖決如流，民有鬼破膽之謠。時寧濠蓄逆策，其必薄吉州，請築磚城以固捍禦。其後賴以無虞，入爲監察御史。武定侯怙寵驕恣，衆莫敢言。景華抗疏論列，聲震朝廷。累至左都御史，開闢薊遼總督漕運所。條上邊防漕政，皆關大計，極力主持。期於得請，時嚴氏柄國，薦紳賄賂輻奏，其門景華一無所餽。嚴以雙緜遺之，報如其物。嚴氏大恨，諷言官以蜚語中之。景華罷歸家居，十餘年，足跡不入城府。卒後不數歲，子

孫貧困至鬻居宅今祀學官

吳 鎧

吳鎧字文濟陽穀人第正德甲戌進士授行人擢南臺監察御史以外艱起復改河南道出按北畿淮揚風紀肅然奸宄屏跡陞福建副使時以甘肅屯政久廢欲得素有才望者改鎧肅州兵備已而大征安南上諭文武大臣求賢任事咸以鎧對陞陝西叅政未幾擢雲南按察使所至聲績赫然

王 杲

王杲字景初汶上人舉正德甲戌進士授臨汾知縣

威信大行治行爲山西第一徵補江西道監察御史
巡視陝西茶馬會歲大稔詔遣中貴人分守蘭靖臬
卽上言窮邊饑歲民方救死不贍若額外設官勢必
增派民將重困乞取回內廷供掃除職庶合 祖宗
官制總兵官趙文貪墨恇怯私結佞倖魏彬爲內援
累經論劾皆寢不治臬因列文所犯皆有狀彬附下
岡上害治匪細乞併論如法以彰國典文竟罷鎮奉
命巡按蘇松江南大饑多方賑貸民賴以全入掌河
南道協贊考察公行汰黜無所承望凡所建白皆關
治體而不掇拾短長以事搏擊癸巳陞太僕寺少卿

乙未轉大理寺右少卿丙申陞都察院右僉都御史
協理院事巳亥歷左副都御史戶部右侍郎河南大
饑奏發帑銀卽民所聚量口給食全活不可勝計辛
丑陞右都御史督漕于淮緣河苦災民多輕徙蕩滌
煩苛噢咻而賑貸之人爲戶部尚書夙夜審畫乃折
兌米開事例括積羨責宿逋理屯鹽悉心畢議率鑿
鑿可行不加賦而事辦丁未再考加太子少保會有
詔買龍涎香久而未獲忌者因以中之逮下詔獄謫
戍雷州卒於貶所隆慶丁卯都給事中辛自修等交
章白其寃狀諭祭四壇遣官造葬贈太子太保

路迎

路迎字賓暘汶上人舉正德戊辰進士授南京兵部主事與堂邑穆孔暉武城王道同師事王守仁專務講學以相切劘轉本部郎中歷知襄陽松江淮安三府豈弟廉平務先惠養至制馭胥吏則操切精嚴治稱第一累官副使叅政浙江按察使擢僉都御史巡撫宣府軍士驕橫往往竄名尺籍錢穀侵冒至不可校迎綜覈有方得其要領上下讐伏母敢乾沒尋陞副都御史巡撫山西入爲兵部左右侍郎陞本部尚書以上疏乞休聞命從容就道祖餞屬路莫不嘆其

知幾卒年八十

彭占祺

彭占祺字朝吉費縣人舉正德甲戌進士除永嘉知縣占祺性廉介剛毅力敦苦操爲邑謝罷供需自奉蕭然不異寒士民以彭青天稱之召擢監察御史權貴有所請托執不肯聽其人啣之出爲浙江僉事乘考察譖罷其官考功覺而自悔言于朝曰某當去官以謝清議中丞劉源清等交章論薦以明其屈甫擬起用而卒今祀學宮

柴世需

柴世需字元功陽穀人舉省試高第夙有文學尤長
詞賦更善四體書法選入中書纂修國史成遷工部
司務督修內苑工程綜理詳密爲時所重官至本部
員外郎

杜萱

杜萱字文孝東阿人以舉人爲順天府通判嘗勘中
貴田莊忤逆瑾而罷瑾誅再起官至姚安府知府土
夷木邦作亂奉檄往論出入寇壘志不少懾夷難遂
平爲人風采凝峻舉止端嚴不失尺寸居鄉有禮不
肯混俗州里之會市人雜坐其間輒撤尊更席而坐

一少年生舉省試謁萱上坐萱引下之曰老夫與而
父遊此非生坐也少年大慙年八十餘卒

劉隅

劉隅字叔正約之中子也舉嘉靖癸未進士授福建
道監察御史時詔以邊憲爲御史大夫隅以憲不任
綱紀上書劾罷已而吏部尚書喬宇免隅以宇海內
人望上書奏留出按江北糾繩貪殘擊斷無諱陞四
川按察司僉事謫官稍遷至永平知府晉河南管河
副使世廟南幸承天所過守臣以供張不辦或至
譴死隅除道河上爲龍舟以濟規制宏敞鉦鼓有節

舟無人聲 世廟大喜陞河南按察使比至承天

詔拜右僉都御史巡撫保定 聖駕北還已於保定

奉迎矣明年進右副都御史西輔多事下令所部繕
完城邑百家之聚皆有雉堞劇盜王士舉以三千餘
人流劫七省隅協各省兵吏勦之以功受賞隅用兵
不惜小費厚賞死士揮金若棄卽有失律必置重典
以是人樂用命未幾罷歸家居幾三十年七十七歲
隅器度汪洋韻宇冲遠居常不爲小察及遇大事確
有定守萬夫莫能折死生利害所臨坦然當之神色
不動風流韞籍海內所推誠一代名人也博極羣書

文詞沉雅號爲名家所著有文集奏議治河通考古
篆分韻諸書

陳守愚

陳守愚字如愚壽張人從邑人殷給事遊舉嘉靖癸
未進士授行人擢都給事中前後十餘疏忠言讜論
疊疊萬言至 嚴旨譙呵亦不少變出爲四川叅政
適番酋猖獗變詐叵測守愚與兩臺定議沮其納款
力贊進師不三旬悉平羣寨邊隅寧謐以母老陳情
得允終養家居十餘年內艱服闋補湖廣左叅政分
守湖南入賀過里而卒守愚天性嚴毅家法凜然自

奉儉薄食無兼味妻妾布衣蔬素存心公平人有過輒面斥之蓋方正之士也

王汝孝

王汝孝字紹甫東平人康毅公憲之子也第嘉靖丙戌進士以禮部郎中改翰林修撰歷山西提學副使陝西叅政河南左右布政使晉右副都御史巡撫順天爲當途者所忌嫉竟以謫戍卒汝孝器宇淵涵問學該博督學山西獎進士類敦尚風雅一時髦雋多所競勸南北履歷所至皆有聲績爲人所稱

趙鯤

趙鯤字宇南壽章人宋濮安懿王之後也登嘉靖己丑進士初仕臨潁知縣興利除奸政聲大著擢南京大理評事讞獄平允爲時所稱出爲漢中知府大盜胡海珠依山險爲寇父子相繼四十餘年鯤首下車卽選練民兵躬率捕緝境內悉平遷雲貴兵備副使卒於官鯤居官清謹囊無餘貲所著有遺稿六卷讀書日記八卷選雋二卷

戴繼

戴繼字叔嗣曹縣人舉嘉靖己丑進士選刑科給事中累至工科都給事中繼丰姿儁雅見者起敬庶務

旁午衆議紛紜常以一言決之中貴爲其黨樹官力
爲參駁不徇以私時冢宰汪鋹陰求附已啗以美官
繼謝弗與通且偕科道劾之鋹旣褫職繼亦去位年
方強壯杜門不出有司罕見其面保薦二十餘疏竟
不肯出

侯 度

侯度字憲甫東阿人舉嘉靖壬辰進士出爲淮安府
推官江都富室殺人倚憑權貴久不成獄度廉得其
實竟置諸法泗州民有被誣爲盜者數人吏知其寃
皆以避嫌不肯爲解度得其枉狀立論出之選四川

道監察御史出按山西前御史王汝楫劾按察使曹嘉嘉憑內援亦奏御史下吏治後御史畏嘉悍戾皆不敢竟度至卽取爰書訊之立劾罷嘉起汝楫士論快之報 命還掌本道遇事勇敢不畏疆禦長安富民蔣氏藍氏以貲雄都邑倚中貴人爲援乾沒縣官金錢動至億萬御史臺忌其請托八年不問度立正其罪謫戍窮邊廷臣皆爲言不爲少徇都人凜凜憚之出按河南坐湖廣貢使遇盜於境逮杖闕下行至良鄉以劄甚卒年四十有四度爲吏廉死無以殮諸御史錄金葬之

扈永通

扈永通字一貫曹縣人嘉靖壬辰進士授中書舍人轉戶工左右給事中尋陞兵科都給事中封題叅駁動以百計具中機宜時緣邊大將要結權貴以冒官賞厥衛恃擁護功多所干請永通皆以令甲持之當路爲之奪氣累至南京光祿寺卿應天府尹已爲忌者所中外補臬司累至河南右布政使所著有會溪類稿四卷

吳嶽

吳嶽字汝喬其先東阿人也遷汶上三世生嶽舉嘉

靖壬辰進士歷戶部主事郎中知廬州保定二府歷
山西副使浙江叅政湖廣按察使山西右布政使晉
右僉都御史以疾請告家居數年起爲右副都御史
協理院事轉吏部左右侍郎南京吏部尚書滿考致
仕嶽爲人耿介端方清操絕俗主事督上谷餉積羨
千金吏以送納正色拒曰羨金卽正餉也或以爲利
吾甚耻之爲郡治貴大體不尚苛細山澤之稅及吏
役班值舊供府堂悉罷却之用代厨傳人以爲難保
定在輦轂下一時徵發四出民不能應嶽具疏奏裁
免十六七諸郡以寬隆慶改元奉 詔內計科臣有

異議疏入留中。獄請政府抗聲曰：公視諸故府往考，察去者科官欲留之，有請其母以傷國體。閣臣悚服，其事遂寢。在南都專抑浮薄，杜僥倖，板會約禮考諸書以行風俗爲志。一變卒年六十有七，遺命子孫母求卹典事，聞諭祭遣官營葬，賜諡介肅。平生孝友誠厚，篤於倫誼，待人容恕，居常恂恂，見人不善嫉之，如讐。奉身儉素，器無銀飾，服無裁綺，歸自留都行李蕭然。廳事不備，至借僧寺接客，里人信其清苦，不謂矯也。工爲詩歌，沉深典雅，屏去色澤而耻以自炫著述不多，梓行詩集二卷。

殷學

殷學字時敏東阿人舉嘉靖壬辰進士授合肥知縣
選山西道御史疏數上皆干權貴人所不敢言按
陝西虜入安定殺掠吏民邊臣匿敗更以捷聞學具
狀以上邊臣懼行賂貴近以爲御史張皇賊勢虛鳴
朝廷謫浙江按察司知事稍遷南京刑部郎中累至
陝西左布政使拜右副都御史巡撫陝西擢南京兵
部侍郎改佐北平協理戎政以疾求退臺諫論其規
避學聞上疏自訟奪爵還里爲人端恪凝重風裁凜
然人莫能窺其際精於吏職志在必行蓋沉毅而具

大有爲之略者也

楊賢

楊賢字子庸濟寧人舉嘉靖壬辰進士授西安府推官以王親例不內補歷遷常州府同知武昌府知府再遷陝西副使勅守岷州西邊無警傭閑役採木修九十六橋於洮水之上以免衝溺西人德之歷河南左叅政按察使湖廣四川左右布政使出納賦金委官稱兌錙銖之美一無所取隆慶二年大計以廉能卓異賜宴南宮號爲方岳第一遷南京光祿寺卿轉北太僕寺卿疏乞歸田奉旨致仕卒年七十八

生平持身廉謹處物謙和歷仕四十餘年以果斷剛
決所至著名或有勸其乘時以取顯要者賢正色曰
事皆有命况天地鬼神森森在上吾將誰欺歸時行
李蕭然殊無長物識者重之

田大有

田大有字豫甫東平人舉嘉靖壬辰進士授行人選
河南道監察御史謫判鈞州稍遷工部郎中擢慶陽
知府興學治戎賢聲大著虜常攻圍郡城出奇制勝
威振西邊已以母老乞歸遂不復出爲人材略優長
伉直負氣居家孝友敦睦有古人風性好讀書多所

涉獵以博雅著稱

曹邦輔

曹邦輔字子忠定陶人第嘉靖壬辰進士歷知元城南和二縣治在廉平裁省與民休息擢雲南道監察御史巡視河東鹽政釐革爲多課溢常額出按陝西會虜入延綏殺鹵甚衆邊臣匿不以聞邦輔上疏奏逮大將以下七人咸論如法秦宗人有殺人獄數年不決一訊而服奏正憲典出爲河南副使流賊剽掠兩河奉詔捕治一日寇至監司錯愕或走伏匿邦輔親率吏士提刀躍馬馳入賊壁衆皆買勇向賊一以

當百賊攝而潰遂破走之再擢浙江按察使值倭夷
入寇特拜右僉都御史巡撫應天將兵禦寇追奔逐
北前後斬虜首六百餘級會趙文華視師求賄不得
反構蜚語論劾謫戍朔州州人感其功德立祠俎豆
之隆慶改元起爲左副都御史協理院事遷兵部左
右侍郎總督薊遼軍務擢南京都察院右都御史遷
戶部尚書考績詣闕以年滿七十疏請致仕拜輔爲
人忠孝耿直志在殉國不避夷險登仕四十年苦節
清操始終如一田產蕭然不異寒士嘗欲以身死封
疆爲朝廷掃清朔漠不究其施世以爲恨卒 賜祭

葬如制今祀學宮

郭朝賓

郭朝賓字尚甫汶上人舉嘉靖乙未進士授戶部主事再遷郎中督餉大同歷陝西河南副使累至浙江左右布政使隆慶辛未入朝留擢順天府尹拜右副都御史巡撫浙江入爲戶部左侍郎總督倉場擢工部尚書滿考累疏致仕爲人老成渾朴雅有器局能任大事斷決神敏吏不能欺而御下寬簡不爲苛細其在大同令邊商能轉粟者各以力多少自占倉庾卽有收券輒給銀鹽不少留滯貴近請托無出而至

比代羨金二萬毫不入其私橐其在西寧撫綏諸羌
不妄勦殺羌奉約束伏不敢動韓宗人奴闖變於市
爲指揮所捕因夜入指揮宅毆之懼而殺其小兒以
誣指揮指揮坐死朝賓廉其枉狀遂雪其冤其在兩
浙收買料價修復陂塘不使豪貴居間有所侵沒其
在工部賈人領價各以其時按籍給予不使困累時
江陵柄國銳於興作議開沕口膠萊二河前後遣官
行視朝賓心知其難不肯附和兩集廷議以請皆得
報罷所省鉅萬談者以持重稱之卒年七十二賜祭
遣官營葬如法

靳學顏

靳學顏字子愚濟人舉山東省試第一登嘉靖乙未進士以藩府姻連久仕郡邑累至吉安知府廉平節愛刑無濫施吉人翕然服之歷藩臬長佐隆慶改元爲太僕光祿寺卿拜副都御史巡撫山西遷吏部侍郎以新鄭當國移疾乞歸不出而卒詔賜祭葬如法學顏爲人廉貞樸茂守正不阿於世味時榮澹然無所嗜好博學慕古文詞道麗有魏晉風軌林推之

任瀛

任瀛磁陽人舉嘉靖乙未進士改翰林庶吉士累至

都給事中歷遷卿寺擢副都御史撫治鄖陽告歸不
出爲人廉介剛直稜稜有氣節扼腕談事慷慨動人
久在諫垣數有建白風采著聞一時憚之

路可由

路可由字子正曹縣人嘉靖辛丑進士授行人選江
西道監察御史巡視京通二倉計察天下財賦利弊
甚悉出按江北風裁峻整有監司貪婪結納權貴前
按臺皆爲彌縫莫敢誰何可由疏其罪狀劾之中外
悚懼九載秩滿歷知保定安慶二府皆有惠政陞山
西副使備兵雁門晉秩叅政尋陞右副都御史巡撫

遼東屬歲大侵蠲免賑濟軍民全活者甚衆虜由馬
根堡入犯檄鎮將血戰斬首二百一十四級虜由清
河堡入寇飛檄諸將分道防禦斬首八百二十四級
捷聞告 廟策勲將有世賞而爲分宜所沮罷歸朝
野莫不歎息所著有遼陽奏議若干卷

侯 鉞

侯鉞字義甫東阿人金丞相摯之後也爲人魁岸有
大度戟髯電目狀貌如神論事侃侃口如懸河每慕
賈生陸贄之爲人讀書日以卷計三數過終身不忘
舉嘉靖辛丑進士請告里居三年詣闕授工部主事

奉命修古恩橋於涿州之南中官上其估百萬鉞爲
上書指陳其狀乃二十萬而足權本部郎中出爲山
西屯田僉事有詔築龍門邊垣五百里衆以虜所出
入相顧莫敢往鉞獨以身任之一日虜大至左右請
入城避答曰吾舍數萬丁夫獨先安往乃驅民入城
身爲之殿夜至宣府城下有老弱總兵者復數十萬
擁門不得入鉞乃坐門外盡入居民而後入再擢爲
山西副使整飭陽和兵備大將軍仇鸞行邊司道皆
伏謁鉞獨長揖不伏鸞初不悅及進而與語縱橫指
畫旁若無人鸞奇其材謂軍門曰此中缺缺侯君一

人拜右僉都御史巡撫大同嘗一再遇虜有首功百餘級未及論功會總兵岳懋死兵部尚書聶豹劾鉞主兵視邊軍敝不整餉乏軍興逮下吏治因諷鉞自辯欲令歸過戶部鉞曰事有不可吾寧身任其咎不敢爲朝廷起大獄竟不以戶部爲解削籍罷歸田里常布袍戴笠乘一白騾從蒼頭一人遊行隴上與田夫漁父抵掌笑謔至揮鋤分畝相娛樂遇者不知其故中丞也時塞上多事鉞有重名廷臣部使交章奏薦方有詔召疾卒今祀學官

梁 成

梁成字公濟平陰人質直廉謹有古人風初舉鄉試
勸駕禮幣不下百金成曰仕將以利民而先自利且
擾里中父兄將安用之力辭不受舉嘉靖辛丑進士
授行人擢兵部主事歷職方郎中時嚴氏柄國苞苴
公行成柄樞曹廉介執法不通請謁輿論有清官第
一之稱遷江西副使備兵饒州素性簡直不事奔競
遂掛冠歸家居二十餘年足跡不至公庭孝友之行
人無間言卒年七十有六

何海晏

何海晏字治象平陰人舉嘉靖甲辰進士除順慶府

推官英敏詳明擊斷無諱擢吏部主事歷文選郎中
遷太僕寺少卿被例補外再遷河南叅政分守汝南
罷歸時年三十餘歲遂不求出爲人風神俊雅綽有
儀觀孝友溫仁恂恂退讓里人懷而思之

朱綱

朱綱字振甫曹縣人嘉靖丁未進士授晉江知縣政
績丕著應召赴京涕泣攀留者數千人入爲湖廣道
監察御史出按山西多所興革軍民便之歷按蘇松
廬鳳會歲大饑朝廷遣使行賑不及齊魯綱疏力請
賑貸全活不可數計六載考績外補陝西副使備兵

關南勦平劇盜稍遷四川叅政按察使浙江福建布政使入爲應天府尹陞右副都御史巡撫河南奏建商丘學校以振士風劾廢逆藩以絕禍本未幾以疾疏請致仕杜門養靜不妄延接卒賜葬祭如法今祀學官

于玘

于玘字子珍東阿人天質穎慧十歲能文一時目爲聖童舉嘉靖戊子省試以母老謁選歷知許州靜寧邊平涼府同知爲郡明習文法政先教化令行禁止道不拾遺聲稱堪著靜寧大侵民或相食請賑臺省

以邊郡錢穀未許輕動乃冒禁發倉按籍賑貸全活可數萬人大吏感其爲民不以罪也韓宗繁衍不法至聚衆毆擊別駕囚之別室玆徐至其所以法曉譬諸宗悚懼而解別駕得免大猾高良據清平萬安二苑牧地投獻慶府暴橫苑民莫能禽制單車入壘誘良出見縛之部使上其治行議擢大郡以邊地寒苦聞子慎言舉於鄉輒申請致仕不俟報而歸爲人矜慎好禮博學工文居家孝友處鄉退讓教訓諸子以行誼爲先出入起居皆有繩度冠婚喪祭叅用古禮不隨世俗爲吏十年家無裕產子女旣衆匱於贍養

衣食不充兩州感其遺愛咸爲立祠邑人祀諸學宮

劉爾牧

劉爾牧字成卿東平人侍郎源清子也舉嘉靖甲辰
進士授戶部主事歷郎中爾牧天資殊絕器度凝重
第時年甫二十練習吏事才伏一時在部八年推會
精核出納明敏尚書方鈍器之諸司署奏皆與議決
西苑建醮詔所徵發常以帑藏空虛力請於上得
減其額積爲中貴所嘆會嚴世蕃舍人窩占邊鹽爾
牧以名奏世蕃恨之諷御史某以變亂錢法劾爾牧
廷杖一百削籍歸里家居十餘年杜門下帷披閱典

記自旦至夜手不釋卷里人罕識其面爲文沉澁奧雅取裁西漢詩有陶柳風骨號爲名家隆慶改元廷臣交薦未召而卒年四十三歲

劉寅

劉寅字敬甫壽張人知州坤之子也世以質行醇謹爲士族式寅性度溫仁口䟽䟽不能道辭好施能讓里人有貧不能自振者必竭力資之舉嘉靖丙午鄉試選永平知縣政在拊循勞來恥言刑罰遇事敢爲無所規避歲災租稅不完至出私財佐賦邑人感之遷隰州知州嘗入山西省試取士二人出而不以告

士竟不知舉者爲誰其不求名迹如此官至揚州府
同知

胡汝桂

胡汝桂金鄉人舉嘉靖丙辰進士仕刑部主事累至
吏部文選郎中擢太常少卿爲人好學慕古潛心理
性與江右諸公講陽明之學月旦爲會海內慕其名
行翕然稱之

張守蒙

張守蒙字啓哲其先陝西華陰人六世祖良弼元末
避亂於滕之王開村遂占籍焉守蒙舉嘉靖甲辰進

士歷知寶應鄆陵二縣咸有能名擢四川道御史督
理屯田時裕景二邸開府各賜庄田千頃守蒙檢先
年所沒逆鸞地數百頃爲成國公所占追奪收入二
府時相嵩方用事世蕃姻連成國屢以爲言守蒙曰
公父子有今日者以爲恩出君上乎抑出成國乎
奈何視其儲貳不如姻家也世蕃不復請而心銜之
陞河南按察司僉事左遷石州判官陞鄖陽同知時
伊庶人驕橫不法爲中丞御史所劾有詔墮其官城
庶人治兵自衛吏民洵懼守蒙知河南府召其用事
爪牙以法論之持重鎮靜徐取所侵奪官民地各歸

其主卽已庶人乃去其兵洛民以安遷鹽運司運使
疏乞骸骨歸一歲而卒

王嘉賓

王嘉賓字國光滕縣人舉嘉靖壬戌進士除太湖知
縣政尚廉平務在全安景王樞過安慶江上騷煩嘉
賓綜理詳密所省不啻千金部使才之擢南京河南
道御史太常周怡以言事左遷給事石星以言事廷
杖嘉賓具疏論救聲動臺端久之廷議置三中丞分
部海內屯鹽人情騷動嘉賓上疏極言不便上納
其言罷寢時嘉賓弟元賓舉乙丑進士同時仕爲御

史皆著風裁里人榮之已以疏宦官織造事語侵部
臣外補歷知寧國大名二府所至皆以興學訓農治
行爲最陞山西按察副使過里道嘉祥舍館疾作而
卒所歷郡邑吏民間訃皆縞素爲位哭之今祀學宮

杜輅

杜輅字從殷泗水人舉嘉靖壬戌進士授中書舍人
以刑部郎中擢河南按察副使備兵汝南請告不出
而卒爲人清姿玉立耿介絕俗精於吏職此讞平允
無所阿縱嘗奉命清獄山西平反爲多薄世味士也

張祿

張祿字宗制城武縣人嘉靖丁未進士由太常博士
選貴州道御史侃直之性出於天成雖權倖之輩譖
朝家之斧鑊皆不足以懼其神者以建言兩被廷
杖處之坦如撫安大同軍隨巡按宣大恩威並著搜
債帥之積弊蘇士卒之艱苦邊務肅清兵威整峻膚
無敢窺關而伺我聲息者後按山西會御史馬祿直
言被謫上疏陳救竟罷斥爲民

李文芝

李文芝字元徵東平州人嘉靖間進士除湖廣道御
史巡茶陝西以議大禮與張桂不合謫都督府都事

累陞山西副使致仕

李良

李良字遂伯平陰縣人嘉靖八年進士授漢中府推官精於法比而不以伺察爲明每讞斷之際必審覈詳明然後具獄獄成奏當卽一字出入屹然如山不可拔民故無冤結舌者擢拜河南御史建言被謫起大理評事陞僉憲累陞都御史巡撫宣大卒

王湘

王湘字大清濟寧人嘉靖乙卯上計偕乙丑舉進士改翰林吉士時館選久停湘首膺茂簡衆論榮之解

館爲山西道御史出按貴州蠻夷懼服內艱服闋北上遇海運舟漂損過當衛士寃號疏請罷海運專用漕輓以息民勞有詔如議遣按順天程書迫急獄囚久繫多瘦死者先期劾請出二百餘人三輔無寃乙亥內察署河南道時相有所囑執弗從見賺遷陝西按副妖徒李一真聚衆吏莫能制湘授方略殲焉陞金衢叅政義烏年少多去本業應募從軍湘命長吏加意拊安遇有召募應以淨民毋輕發聞左抗管之變衢兵聞風不譏湘登壇示以軍法士股栗無敢譁者遷本省廉使改山西擢湖廣右布政轉左 上遣

中貴從司寇治江陵湘主議請毋波及全楚司寇從之籍見產以報無所株連中貴欲復遼國湘據衆議不可中貴弗能奪也此兩事有大造於楚楚人德之而湘爲故相所抑反全其孥世尤多其長者故事採木之役弊孔百途湘以便宜召買費省而速及他所裁損歲可鉅萬居楚五年遷南太僕卿抵滁值歲不稔出秩金糴穀滁人賴之陞南大理卿一以律文從事無所唯阿嘉興陸公爲司寇亟加稱服嘗與要人有郤子告歸田日與昆弟親戚醪社使車及門輒匿不見識者嚴之居家內行甚修子弟遵軌聞軍民疾

本朝分省人物考 卷九十五
六十一
苦輒言於吏不使人知里頌其義病而羣禱於祠沒而悲嘆罷市其得人心如此

于慎行

于慎行字無垢東阿人父玘爲平涼同知以廉節祀名宦鄉賢母劉淑人夢菴摩羅果綴實甚巨遂生慎行生十一歲而淑人蚤世條淑人言行著於篇讀者悲咽十四試童子郡縣皆第一學使孝豐吳公異之拔冠充郡學官州判某來攝邑以側理隄糜餉慎行不受父問故曰此分宜客也宜遠之嘉靖辛酉舉省試第六畧而赴鹿鳴諸大夫卽席欲爲冠辭以未奉

父命隆慶戊辰登第選庶吉士庚午授編修纂修
肅穆兩廟實錄甲戌同考禮闈晉修撰充日講官

上勤政勵學日御經帷慎行主講唐史每至成敗得
失之際反復論說 上輒悚聽講罷或分命題咏慎

行不善臨池詩成則倩人書之具以質對 上大書

責難陳善字賜之丙子進侍講明年江陵奪情同官

蘭谿新建輩七人共爲疏力言不可時毘陵吳姑蘇

趙以爭奪情杖闕下疏入而桂林呂公中止勿奏江

陵以講臣未敢顯斥佯以他事致喪次謂曰子吾所

厚亦從人爲此耶則正色曰以公厚我故爲此相報

江陵艱然再踰年已卯遂引疾歸歸四年 詔入日
講如故久之進左諭德時江陵已謝世言者振暴其
罪 上命司寇丘公同內璫往籍其家江陵柄國旣
失士大夫心至是咸推波助瀾甚之爲快慎行獨貽
書丘公言江陵嘗有勞是非功過當爲別白卽間有
受取亦可指數較分宜馮璫萬分不及必欲捕空捉
虛廣爲搜括恐株連全楚皆受其累且江陵母老在
堂諸孤少不更事覆巢之下顛沛可傷宜謀之有司
請於 明主乞以聚廬之居立錐之地合古人惟葢
之意纏纏千餘言極其切至丘卒從之乙酉典試南

畿晉侍講學士丙戌晉禮部右侍郎己丑改吏部掌
詹事府卽擢禮部尚書兼學士疏請 冊立郊廟諸
大典禮而冊立晁懇章十餘上時 上意已默定不
欲人言屢旨責慎行慎行持之愈堅至自劾乞罷九
疏乃報允賜金幣給驛以歸久之 上復思慎行以
舊官掌詹事府使講春秋疏辭不報至丁未命以太
子少保禮部尚書兼東閣大學士入輔政時以宿疾
發微有所苦就道則趑趑不欲行乃勉力抵陛見以
怯寒拜起舒緩自疏請罪 上溫旨慰令視事慎行
勅舍人勿解裝爲歸計自是臥病草遺疏惓惓以親

大臣補言官起廢棄爲請已伏枕長歎曰吾終不能報國矣更數日遂逝得年六十有三自兒時已儼然大人器度高文襄與父平涼公有通家誼卒不一往見御史劉臺上疏被逮人以江陵故率避匿慎行獨往視當江陵柄政士大夫稱功頌德者十人而九慎行絕不相附及死而被禍所爲引大體調護營救者惟慎行其所與丘司寇書天下傳而誦之所著有穀城山館集春曹奏議讀史漫抄經筵講章兗州志筆塵史摘等書郡邑併祀學官兩臺使復下檄有專祀

趙惟勤

趙惟勤字業甫曹州人少負奇節以古人自期許嘉靖丁酉弱冠魁東省三上春官不第謁選令獲鹿地逼邊民慄悍多盜爲蠲苛削冗挫強抑奸民賴以寧歲歉借賑以活饑民內召赴闕有欲以五百金代賂分宜者堅辭之遂知平定州府守道經獲鹿以坐索受窘得報甚喜無何復丁內艱惟勤曰向以弟幼不能迎養二親旣又不能襄母大事今幸老父在奈何不效菽水恨無官哉朝夕承歡未嘗少間疾躬藥餌衣不解帶者四十餘日焚香祝天願以身代而父竟不起居家三十年修謹好施勸化里俗年七旬卒邑

祀名宦州祀鄉賢

張綸

張綸字宣甫人咸稱爲釣石先生汶上人綸生而重瞳舞象之歲卽志聖賢之學同里旺湖吳公講學綸從之遊後四方名學從綸遊者與吳公埒綸數奇不第嘉靖癸亥纔歲舉時旺湖公方佐太宰欲縣美缺待綸綸謝不受丁卯司訓秀水一切修費弗納日羣諸生講道于羣樂軒故事以貲入太學者率厚餽綸欲却恐不便於諸廣文姑聽之稍遲卽持所餽充賀儀辛未陞青縣諭捐金風諸生築河隄衛學官壬申

擢三河令三河衝疲綸力任勞怨查隱地省畝稅均
邑車定馬戶發中貴之陰事責太宰之速租督撫及
直指薦綸有三不撓三不知之語乙亥擢通州守綸
至通剔奸釐弊不避權豪聽獄以情片言立折密雲
有妾毒殺其夫之弟綸訊其夫立叩頭服守通四載
兩入計不持一芥巳卯用卓異擢戶部員外督運惠
通河一日夜運二萬石督儲易州先郎中被劾構者
欲擠之死綸力雪其冤條上便宜六議俱報可出入
平允收支俱不令有羨金忌者乃誣綸江陵黨左遷
肅府長史上疏乞歸家居四年卒卒之日囊無長物

去三河時庫吏密持羨金三百餘兩投私署綸麾之
出令買穀賑濟在通積羨金三萬申請貯庫抵小民
一年之稅歷宦十五年祖所遺饘粥田不加尺寸所
著有三圖說圖書考撰著考格致問易譚四書原多
前人所未發門人馮開之爲之志姚羅浮爲之碑表
其墓曰醇儒廉吏張鈞石先生之墓

劉不息

劉不息字體道磁陽人舉隆慶戊辰進士授寶坻知
縣政績卓異入覲賜宴南宮擢吏科給事中累官太
僕少卿以疾請告滿詣闕會吏侍王篆用事權門求

賄不得歲餘不補復請告卒不息老成詳練動合機
宜兩主大計激揚得體稱爲名都諫云

賈三近

賈三近字德修嶧縣人舉隆慶戊辰進士選翰林庶
吉士授吏科給事中萬曆改元起戶科都給事中所
議吏治民生皆匡濟大略不爲文具論救言官彈劾
彊貴多與政府相左以久歷太常大理少卿再遷南
京光祿卿請告里居甲申起爲光祿寺卿拜右僉都
御史巡撫保定西輔大饑民多死徙疏請停罷徭租
大發倉庾量日賑貸設厰千餘區賦粟煮糜粥日食

男婦二十二萬口他省流民多出其境別具食道上
待之西輔之民賴以全活家室咸爲位祝焉以親病
乞歸家居五年壬辰寧夏兵變用廷臣推薦召爲兵
部侍郎未行而卒三近器宇軒豁風神朗秀持已當
官端方揮霍無所阿私而溫厚坦夷不設城府涉獵
羣書博綜衆藝爲歌詩疎爽有致咳唾立成蓋才士
也所著有先庚生傳寧鳩子東掖漫錄奏草諸書

趙雲翔

趙雲翔字元舉平陰人隆慶戊辰進士歷文安遷安
知縣歷陝西按察副使備兵延綏爲人瑰岸豁達磊

磊有度心計精敏家居十年以邊才議推未及用卒

任勵

任勵金鄉人爲人嚴潔剛正貧時謂友曰他日倘磨一命厥志若何其友答曰當官固欲奉公亦須爲子孫稍置私橐勵怒髮上指後爲長葛知縣部使私囑少購皮革勵陽應諾少頃牽水牛數隻詣堂下曰此赤子耕具粒食之原也部使慙怒因以他事誣之羅織下獄竟憤抑死

王潺

王潺字元順東阿人以貢仕華陰丞爲人朴厚醇確

潛心力學步趨言動皆有準繩常危坐靜室月餘不出曰當其靜極時心如皎月當空平生所疑觸處皆悟少時讀書山寺僧藏一婦人於潺所居舍潺卽獨處終不迂視僧竊窺之相顧嘆服平生口無妄言身無妄動其天資近道如此

陳職

陳職字汝受東阿人爲邑庠生應貢以母老不行受賢書而藏之以終其身爲人純朴慈厚好談理學初得陽明先生語悅之日夜潛思若有所悟與同邑邢文舉在平張後覺月旦會講諸邑子從之者數十人

廬陵鄒公善南城羅公汝芳皆與之遊至集齊魯諸生延職升席使爲都講四方慕之

蘇則曾

蘇則曾字宗魯東阿人以貢爲武安訓導博物洽聞於經史百家無不貫穿考核理數剖析名物細入芒忽然不多著述間爲詩歌頗近宋體以是不著平生積書甚富後爲里人竊賣無一帙不經點竄者人稱之曰蘇經笥

趙邦彥

趙邦彥字元哲東阿人少有雋才豪宕負氣不修小

文舉嘉靖癸卯省試十上春官不第構室虎窟山中
閉戶下帷覃思著述馳騁千古有文二百餘篇雄渾
精卓自爲機軸詩凡三千餘首詞藻壯麗取法初唐
其品在東省二李之間其自謝茂秦以下皆弗如也
不仕而卒

楊廷高

楊廷高字叔謙山東金鄉人由進士嘉靖二十八年
授平湖知縣性狷介不苟取與督家人紡織未嘗知
有肉味衙後有隙地種蔬自給以其餘饋士夫且曰
爲士夫不可一日不知此味排里之輪役者謂之見

年凡縣一年之費皆需焉民苦浩繁楊一切裁省減
十之九民甚德之在任三年水蘖之聲徹于遠邇清
介絕俗雖古廉吏不過是矣官終布政使